

LA CITE' DE  
**RHODES.**

EN LAQUELLE  
L'ORDRE DE S. IEAN  
DE HIERUSALEM A DEMEVRE'  
213. années, depuis l'an 1309. iusques en l'an 1522.



## DESCRIPTION DE L'ISLE DE RHODES.

**L'**ISLE de Rhodes est comprise entre les Isles de l'Asie, en la prouince de Lycie, & est separée d'icelle par vn canal large enuiron de 40. lieuës françoises, appellé le canal de Rhodes; ladite Isle a de circuit enuiron autres 40. lieuës: sa forme est quarrée, & vn peu longue, laquelle a pour ses confins ladite prouince de Lycie, du costé du Septentrion, l'Egypte du costé du Midy, du Leuant l'isle de Cypre, & du Ponant l'isle de Candie, anciennement appellée Crete, située sous vn Ciel temperé, où le Soleil paroist tous les iours, & pour ce subiet fut par les anciens dediée au Soleil.

Consistoit autresfois en trois principales villes & forteresses nommées Linde, Ialison, & Camiron, du nom des enfans de Leorate Chef des Hilliades, Prince & Seigneur de ladite isle, desquelles la seule Ialison est restée sur pied, & avec ladite Isle a retenu le nom de Rhodes.

A l'embouchure de son port sur les deux rochers où sont à present situées les 2. grosses tours de la chaine, estoit fondé le grand Colosse du Soleil, fabriqué de bronze, de la hauteur de 70. coudées; & estoit si admirable, qu'il fut mis au nombre des sept merueilles du monde, lequel fut renuersé par vn tremblement de terre, & son métal emporté en Egypte sur 900. chameaux chargez, longues années apres sa cheute, en l'an de N. Seigneur 654. & 1460. apres qu'il fut fabriqué.

Ladite Isle fut reduite sous l'obeyssance de la Religion militante des Hospitaliers S. Iean de Hierusalem, par la valeur & industrie de Frere Foulques de Villaret 24. grand-Maistre d'icelle, & par la generosité des Cheualiers de ce temps-là, le 15. Aoust, 1309. soustraite de l'inauasion d'Ottoman, premier Empereur des Turcs.

Ladite Religion s'est maintenuë à Rhodes l'espace de 213. années contre l'effort de 3. ou 4. sieges d'armées Imperiales des Empereurs Mahometans.

Le premier siege fut en l'an 1310. l'année suiuaute apres la prise d'icelle, & ce par l'armée d'Ottoman I. & le genereux Amedee Duc de Sauoye luy fit leuer le siege.

Le second fut par le Sultan d'Egypte, qui estoit gouuerneur du Royaume de Hierusalem, qui assiegea Rhodes l'an 1444. au mois d'Aoust, & tint le siege deuant Rhodes l'espace de 5. années entieres, où Fr. Iean de Lastic, 35. grand-Maistre dudit Ordre, soustint tous ses efforts: le Turc à la parfin fut contraint de leuer le siege, & se retirer avec sa honte.

Le troisieme siege de Rhodes fut mis par Mahomet II. fils d'Amurath II. le 23. May, 1480. par son armée composée de cent mil hommes de combat, & Fr. Pierre d'Aubuffon 39. grand-Maistre dudit Ordre soustint ledit Siege, & força ledit Empereur de leuer, & s'en retourner à Constantinople.

Le quatrieme siege fut mis par l'Empereur Solyman 2. fils de Selim I. le 26. Iuin, 1522. & sept mois apres, le propre iour de Noël il se rendit le Maistre de l'isle & de la Cité de Rhodes; son armée composée de 400. voiles, & de trois cens mil combattans, desquels en ce siege furent tuez plus de cent mil Turcs. Ledit siege fut soustenu par Fr. Philippes de Villiers l'Isle-Adam, 45. grand-Maistre dudit Ordre, qui ne peut auoir aucun secours des Princes Chrestiens, au tres-grand malheur de la Chrestienté, toutes lesquelles particularitez desdits sieges se trouuent plus exactement enoncees dans l'histoire de la Religion.